



KEMENTERIAN PEMBANGUNAN WANITA,
KELUARGA DAN MASYARAKAT

KENYATAAN MEDIA

JKM DAN MENTERI CAKNA KEPERLUAN MANGSA BANJIR KAMPUNG ORANG ASLI BUKIT TADOM

Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat (JKM) **menyangkal tuduhan yang dibuat oleh portal berita MalaysiaKini yang mendakwa Jabatan ini dan Menteri bertanggungjawab tidak mempedulikan mangsa banjir Kampung Orang Asli Bukit Tadam.**

Untuk makluman, penempatan dan pengurusan bagi mangsa banjir Kampung Orang Asli Bukit Tadam pada awalnya diuruskan oleh Jabatan Kemajuan Orang Asli (JAKOA) di Pusat Pemindahan Sementara (PPS) SK Bukit Tadam. Bagaimanapun PPS itu telah dinaiki air, maka Pusat Kawalan Operasi Bencana (PKOB) menasihatkan dan meminta mangsa berpindah ke PPS SK Labohan Dagang untuk keselamatan. PKOB akur dengan keputusan penduduk Orang Asli untuk tidak berpindah ke PPS yang disediakan, sebaliknya meminta kekal berada di sekitar kampung. Susulan itu, Tadam Resort Hill telah menyediakan khemah untuk penempatan sementara mereka. Pada masa yang sama, JKM telah menguruskan pendaftaran mangsa dan segala keperluan asas terus disalurkan oleh JKM kepada mangsa dengan sokongan dan kerjasama pihak NGO serta orang ramai.

JKM Daerah Kuala Langat juga telah mengagihkan bantuan seperti bekalan makanan dan barangan keperluan asas termasuk toto, kain batik, kain pelikat, air mineral dan lain-lain keperluan seperti di PPS lain. Menteri Pembangunan Wanita, Keluarga, dan Masyarakat, YB Datuk Seri Rina Mohd Harun juga telah meluangkan masa mendekati sendiri penempatan sementara tersebut pada 22 Disember 2021 (Rabu) dan menyerahkan bantuan kepada mangsa-mangsa. Pada 23 Disember 2021 (Khamis) pula, Timbalan Ketua Pengarah JKM, Puan Rosmahwati Ishak turut menyampaikan sumbangan kepada Tok Batin Hadi untuk diagihkan.

Dalam situasi banjir yang cukup mencabar ini, JKM sentiasa memahami keperluan Keluarga Malaysia termasuk Orang Asli yang juga merupakan Keluarga Malaysia. JKM tidak pernah memilih kasih ataupun tidak adil dalam berdepan situasi getir seperti ini serta sentiasa bekerjasama rapat dengan JAKOA untuk menangani permasalahan Orang Asli.

###

**Unit Perhubungan Awam
Jabatan Kebajikan Masyarakat
No. 55, Persiaran Perdana Presint 4, PUTRAJAYA
25 Disember 2021**